

攻

媿

集

三



中國書局
中文圖書



攻 媿 集

(三)

J
17.8
12005

撰 鑰 樓

攻媿集卷十

今體詩

南山廣莫軒

廣莫垂風隘九州。亂山無數點平疇。一千里外在吾目。三十年來無此游。地下天高俱歷歷。鳶飛魚躍兩悠悠。昌黎費盡南山句。曠遠還能似此不。

送趙至道節推

君來入幕恰三年。我幸投閒識此賢。婉畫時時因事見。素風凜凜信家傳。易林律本君須寄。月窟天根語是圓。問訊難兄無恙否。相忘千里各瀛壖。

湖亭觀競渡

涵虛歌舞擁邦君。兩兩龍舟來往頻。閏月風光三月景。二分煙水八分人。錦標贏得千人笑。畫鼓敲殘一半春。薄暮游船分散去。尙餘簫鼓繞湖濱。

龍潭方丈

又因寒食此中來。牕戶虛明絕點埃。山裏春風無間斷。海棠開過棗棠開。

弔僅老塔

僅老相從五十期。來瞻遺塔我心悲。當時舊話無人說。空有門前洗鉢池。

夜攜家登南渡橋

幾過長橋下。清宵得意行。風高江水急。月上海潮生。空迴寒逾峭。更深境過清。扁舟難久駐。轉柁問歸程。

題夢月上人送鴻小樓

兩洗春山空翠新。登樓不見送鴻人。薜蘿清夜月依舊。無復新詩泣鬼神。

贈于湖劉相士

自笑今年卦氣闌。壯心銷盡鬢毛殘。明知七十無多子。只問何時可掛冠。

五月望月蝕歷家又言六月朔日蝕

閨巷夜爭呼。相傳救望舒。偶因雲暫破。真似月之初。孰謂養能瞎。端知歷不疎。太陽交蝕近。試看更何如。

題賀監李謫仙二像

不有風流賀季真。更誰能識謫仙人。金龜換酒今何在。相對畫圖如有神。斗酒澆詩動百篇。鑑湖牛渚兩俱仙。早知今日猶相對。不向稽山回酒船。

病後戲作

河魚腹疾未全除。一飯充飢不願餘。縱有珍羞難下筯。真成頓頓食黃魚。

枕上

不守庚申不坐禪。老來觸事總悠然。天明門外無來客。儘好蕭蕭聽雨眠。

謝蔣行之送菊

秋老懷情儘自寬。眼前只欠菊花團。分來三徑雙株秀。先得重陽兩日看。玉輦金輕無限態。風高露冷不勝寒。幽人相對成清伴。正爾落英供夕餐。

廳事落成老母置酒喜而成詩

數椽增葺苟全時。我愛吾廬喜得歸。兒輩粗能勤父蠱。老天無不費心機。年來每愧踰初望。病裏尤知悟昨非。從此蕭然無一事。但當日舞老萊衣。

十月十七日夜

蟄蟲坯戶六經旬。掣電驚雷若暮春。震起昆蟲千百億。不知何處更容身。

織錦綦盤

錦城巧女費心機。織就一杯如許齊。彷彿回文仍具體。縱橫方罫若分畦。爛柯未易供仙弈。畫紙何須倩老妻。如欲拈綦輕且稱。當求白象與烏犀。

叔韶弟以退堂洪老詩來寄謝

不受人天供。甘心樂隱居。空窮千里目。笑擁一樓書。攻媿老無用。退堂閒有餘。相望可杭葦。何日訪吾廬。

寄題正卿通判可高亭

樟坡直上可高亭。未見高高祇見名。想像豈能勝一覽。登臨安得快雙明。大龍湫水聽雷吼。白石岩頭看日生。咫尺好山隨杖屨。自應老筆擅詩聲。

中秋次從子涪韻

雨餘不見日西沈。將謂中秋又作陰。佳月忽開千里影。騷人滿慰一年心。埽除塵翳風難動。滓穢太清雲尚深。坐待寒光誰會此。阿咸爲我發微吟。

楊花

杜門無緒看芳菲。見說楊花滿路飛。謝汝不隨人冷暖。因風翻舞到柴扉。

送趙南仲丞溧水

不用怱怱恨別離。版輿春晝綵衣隨。往題斯立藍田壁。更訪清真溧上詩。公事毋庸倚牙角。鄰封真是和墳篋。日哦新句頻相寄。明月清風慰所思。

戲題龍眠馬性圖

狗子已知無佛性。馬又何曾有性來。伯樂若來休著眼。任他騏驥混駑駘。

他山

素蜺橫臥作雷吼。日射細鱗銀雪光。安得此身如白鷺。倚然終日在梅梁。

過盡水禽竝野鳧。風標惟許一春組。可憐久立梅梁上。不爲谿光祇爲魚。

小酌元衛弟聽雨

小閣臨流暑氣清。藕花的的照人明。移牀更近欄邊坐。要聽鶯聲雜雨聲。

瀟再往剡中念之尤切作詩寬之

剡縣不爲遠。丞官勿謂卑。鼓盆知愛重。去國倍行遲。堂上森三老。房中秀一兒。加餐了官事。莫賦悼亡詩。

觀雲寄簡講師

蒼狗俄然又白衣。來從何處去何歸。無心出岫還歸去。莫向秋風說是非。

過故家

團團桂樹擁簷牙。舊日輕黃滿樹花。惆悵秋清無一葉。空餘枯枿結寒瓜。

題從子浹娛親

阿戎築屋爲娛親。野草閒花日日新。我奉版輿來舉酒。祈君親壽似夫人。

丹桂

碧雲步肇紫金蕤。風靜秋高千萬枝。嬌額塗黃元自好。是誰深博蜜臙脂。

下元日暖甚夜風雨大作早微雪從子灑以醑釀來

眼明喜見早醑釀。臙外風號集霰時。梅藥已慙前臘破。芳心休用怨春遲。納涼除夜昨幾似。見雪芭蕉今

不疑。若使洛人真得此。應須更詔百宜枝。

送朱叔正守南劍

舍人簪筆舊甘泉。家學相傳子姓賢。未羨夾河爲太守。阿連剖竹向封川。
橋李曾蜚剽劇聲。貳車仍贊虎頭城。朱轡小試承流手。要繼桐鄉循吏名。
萬竹蟠山喉不乾。兩龍潛水氣猶寒。郡齋見說真圖畫。公退何妨一倚欄。
下水上山腰帶州。人家無數起危樓。遨頭不用喧簫鼓。祇把清詩紀勝游。
同盟東下或西征。老我惟知管送迎。祇恐政成登省戶。未容歸騎向西城。
名畫法書知幾編。捧銓寧復計求田。摩挲贖買新文字。歸滿米家書畫船。

送杓孫隨侍上虞

阿斗生來十五年。未曾一日去翁前。聞詩勿廢家庭問。習吏仍求城旦篇。婚宦有涯真是幸。巾箱所蓄要
相傳。榮壘雖小性非魯。口授詩書加愛憐。

戲作

二子爲丞分越邑。女兒隨壻過江南。笑言屋裏成岑寂。匹似當初只住庵。

諸瑩拜掃晚歸長汀

雨意早垂垂。寒雲晚更低。空中時散點。道上不成泥。綠柳桃相映。黃花麥與齊。紆回餘百里。喜見舊松隄。

送朱季公守封川

韶陽生長十餘年。城郭重經固宛然。歎息紫微仙去久。尙餘遺墨照山川。

先舍人居韶十四年。季公生于壬戌。陳秀公會守封川。有遺愛。

桐鄉漢有大司農。封守今推陳秀公。君向邦人著遺愛。近追相業遠家風。鄉評久說鴈行賢。剖竹封川與劍川。不用對牀風雨約。政成問取舊青氈。吾鄉基社寔凋零。賴有朱家好弟兄。舉酒看看故人少。陽關莫唱斷腸聲。妙舞清歌有二姝。後堂曾見繡羅襦。嶺南太守風流勝。不用歸舟載綠珠。

以玉蘭贈王習甫

一種香蘭玉色新。仙家分得蕊宮春。調高韻勝誰能稱。付與能言解語人。華屋暈飛慶事縣。芝蘭玉樹喜庭前。似聞楚畹芽初茁。便看藍田生晚煙。

送趙清臣宰姚江

玉立君家好弟兄。藍田風采照花城。版輿壽母人間盛。千里何曾去送迎。鄞江水與舜江通。久矣威名滿一同。試問何時到封部。數聲柔櫓一帆風。長江東去跨虹橋。千丈橫隄捍海潮。更向燭谿圖永利。坐令百里沸歌謠。才刃恢恢妙撥煩。鄰封撫字尙何難。更能觸事加長慮。自有甘棠向後看。歸家故步懶重尋。藏拙年來恐不勝。短棹有時乘興去。徑登竹所聽鳴琴。

楊花

雨壓輕寒春較遲。春深不見柳綿飛。忽然飛入閒庭院。疑是故人何處歸。
柳綿無數糝枝頭。日暖隨風撲畫樓。萬象可觀惟有雪。喜看晴晝滿空游。
爲我輕攀綠柳枝。帶花低護笑攜歸。日長深院微風動。要看鬆綿當面飛。
野芳庭草是生涯。老去祇宜閒在家。幾日惜春留不住。小鬟爲我拾楊花。

送王伯奮守筠陽

三槐名德萃清門。七葉爲州賴有君。道院無忘山谷賦。郡齋當繼潁濱文。君應膝上憐文度。我向東牀憶右軍。振起家聲差易耳。便看奏最躡青雲。

別王恭叔

兩兒雖近隔江湖。賴有王郎慰寂寥。遠侍雙親官道院。爲同盡室餞西橋。腦脂遮眼最關念。客路尋仙勿憚遙。別後飛緘問安否。數來谷口訪山樵。

別長女涓

老我年來百念輕。文姬助我以琴鳴。等閒相對成三弄。遊戲俱彈似一聲。舉酒不堪千里別。登途知用幾程行。郡齋自是神仙窟。會有堦庭玉樹生。

趙資政園梅篆

小徑回環里許長。寒梅森列間疎篁。路如古繭繁繆篆。身似輕烟繚印香。九折坂中經蜀險。八盤嶺上趁朝忙。歸來游戲通幽處。笑看危途幾太行。

示從子

東院敲棋西院琴。固知猶勝別勞心。少年不比老癡叔。且向書牕惜寸陰。

贈畫梅呂生

西湖處士賦疎影。未似希貞好樂章。豈是無情甘澹泊。受他風月幾淒涼。

瀟自剡州寄水晶蒲萄

馬乳從他堆滿盤。未如清嚼水晶寒。固知一縣蒲萄熟。不用勞人數問安。

送汪莊仲赴江東倉幕彊仲荆門簽判

不見適齋老。于今三四秋。弟兄登宦路。親黨駐行舟。老病無詩思。衰懷重別愁。外家門戶盛。勸力紹箕裘。外氏蒙恩厚。文昌獨我知。居慚酷似舅。喜有寧馨兒。遇事行方便。視身謹護持。公餘定多暇。黃卷有餘師。早歲過秋浦。食程不入關。君今參儉幕。時得上齊山。膚使資關決。賢侯伴宴間。好音頻寄我。藉此一開顏。之子游何許。平州更玉州。山川稱勝絕。幕府信風流。翠幟寒逾秀。金蓮夜不收。天涯念鄉國。少上仲宣樓。見說荆門地。如門蔽楚荆。舊時爲內郡。今日號邊城。但守平平策。毋求赫赫名。勉哉關決際。從此振家聲。

送元積弟赴淮東總屬

南徐來往飽經過。總餉賓寮入禮羅。子去幸陪鄒湛輩。君今還是伯休那。金閨通籍時方可。鐵壘名城景最多。我有淨名遺記在。試從萬井訪維摩。

十人兄弟五人存。心事方欣得細論。可但衰遲憐遠別。只因喜懼有慈尊。倚門何止期吾子。發策還知望好孫。從此三年風雨夜。寂寥基局與清樽。

陳君舉既亡汪文子攜其所作春秋後傳及送行詩來次韻

名盛望尤備。枝披實亦繁。無由究賢業。猶幸立斯言。書在經逾顯。人亡道更尊。九京如可作。與子共南轅。

送趙伯藏倅永嘉

當代投閒老吏師。佳兒官業具而微。已煩潘令宰花縣。正要王祥康海圻。得助江山詩興逸。平分風月羽觴揮。安車何日迎清獻。又向堂前戲綵衣。

分教分符恰五年。異鄉每若故鄉然。歸來幾作池塘夢。送別欲隨騶御仙。目斷甘林應飽熟。手栽藥實想芳鮮。邦人若問老州牧。爲說清霜繞鬢邊。

晝寢

彈徹悲風更廣陵。滄浪一爲濯塵纓。邯鄲枕上夢初覺。喜聽簷間風雨聲。

喚仙閣

上到危層莫喚仙。纔凭橫檻挹江天。江天如許來供眼。何用王喬更偃僊。

多少尋仙更不還。渺茫竟墮有無間。使其真有毋庸喚。仙自層城我自山。
犯暑來登覽。松風爲洒然。龍泉登古井。虹影臥中川。萬簇寒林秀。四山秋色鮮。詩翁不可見。況敢喚飛仙。

送趙敏之丞彭澤

淮甸歸來涉學深。孤雲又出亦何心。公餘巖下讀書去。遠繼風流石橘林。

淵明事晉肯臣劉。仁傑忠良不附周。見說三賢參羽士。射斯光。盍將吳簿配蘋羞。南唐吳舉爲彭澤主簿。有高節。見六一集。

陶令居官八十日。始爲督郵方賦歸。君家門戶要興起。未用飄然詠式微。

阿虞試醉戲作

阿虞匍匐醉盤中。事事都拏要學翁。最是傳家清白處。不將雙手向頑銅。

贈別盧甥申之歸吳門

千里何妨命駕遲。晤言未厭已西馳。子休重賦瓊瑰贈。我亦懶歌瓊戚離。好向清江論樂府。更從葉子說新詩。樂閒引紙五十尺。爲篆離騷繼李斯。

又謝申之示詩卷

不見賢甥十一年。新詩示我百餘篇。古風已喜能行意。近體尤欣細屬聯。宅相真成珠在側。冷官休歎坐無氈。作詩勿謂今餘事。更下功夫繼玉川。

送秦仲防通判

清德曾瞻啓慶碑。孫曾清更畏人知。祇緣一介弗輕取。坐使斯民不忍欺。瀨水家傳御書卦。宣城手寫送行詩。典型尙繼金鑾舊。馬氏一門誰白眉。

題輿再到海東涯。嗜學深于入幕時。一字未通終不置。五行俱下尙嫌遲。情親端有卜鄰意。別後空勞望月思。老我無因可重見。祝君來此擁旌麾。

謝剡中沈元龍惠詩

東陽何事到東州。百語曾無一語酬。深羨松筠無敗葉。自言蒲柳已先秋。千金既覺成虛擲。雙壁還驚又暗投。別後未知何日見。但將吾道付滄洲。

謝舒景叔寫照見贈

誰寫衰容入畫圖。本來面目舊形模。幾年老瘦鬢如雪。不道今吾非故吾。

庭前一蓮著花

門外荷蓮浥露華。綠雲平地擁秋霞。病夫不耐出門去。且看庭前第一花。

消月下鼓琴用消韻

老穉團圓鯉在庭。文姬爲鼓玉琴聲。起來同作悲風曲。倍覺先秋月影清。

國仲觀遷居尹隩訪別

晚年未定一枝巢。到處蓋頭無把茅。又欲浮家過尹隩。何殊樂道向莘郊。君今去此難招隱。老更從誰可

定交。見說衡門臨野水。秋深容我去推敲。

仲觀有詩來謝次韻

危機屢見劍頭炊。喜及挂冠神武時。從此含藏三寸舌。算來插得幾張匙。讀書牕下頻勤習。攻媿庵中老住持。速辦小舟頻往返。及今精力未全衰。

謝王粹中惠白鶴山麟川觀斑竹杖竝竹輿

麟川仙館翠琅玕。荷子攜來白鶴山。未效葛坡龍種化。絕勝湘浦淚痕斑。裁爲拄杖一尋許。巧作乘輿四尺慳。兒子門生俱努力。病夫欲過虎谿還。

曾無逸郎中名燕居曰和三續社有詩次韻

欲和會三家以續雙林。

通地通天祇箇中。千歧雖別大都同。兩家偶爾流傳盛。一貫臨之內外融。欲境埽開心在我。浮雲散盡月當空。感而通者後來語。不感須知自有通。

老來

老來何以度光陰。祇有圍碁與鼓琴。碁爲心勞疎對局。琴因臂弱倦調音。曲肱時復同尼父。面壁何妨學少林。氣習未除祇自笑。又還弄筆動微吟。

長生章

玻璃擢葉玉蟠根。千里提攜寄海濱。雨澤不霑仍自潤。土膏無著自長春。歲寒秀色鎖依舊。日暖素英能

一新。我欲餌之求久視。恐君靈已不靈人。

謝黃汝濟教授惠建茶竝惠山泉

幾年不泛浙西船。每憶林間訪惠泉。雅好誰如廣文老。親攜直到病夫前。細傾瓊液清如舊。更論雲芽味始全。或問此爲真品否。其中自有石如拳。

史子仁碧泚

相家本有四明山。更葺桃源渺莽間。四面樓臺相映發。一川烟水自彎環。中川累石勢嵯峨。城上遙岑聳翠螺。舊說夕陽無限好。此中最得夕陽多。

題趙晞遠二畫

藻穢數尾已如生。妙絕魚兒作隊行。不是深知濠上趣。未應筆底得縱橫。魚屬。
牕前驚見一枝斜。照眼英英十數花。千載簡齋僊去後。何人更著好詩誇。墨梅。

送陳表道倅岳陽

垂上青雲去。如何乘貳車。輕爲千里別。時寄幾行書。剗劇才無滯。傳家學有餘。當塗足知己。應不費吹噓。聞說巴陵好。樓高占古城。湖光千頃白。山色一螺明。赤壁沈沙戟。蒼煙老樹精。好詩收拾下。寄我慰離情。
元珍弟酌別賦此贈之

歸來十暑又三霜。衰病那知謁帝傍。採菊初期老陶令。種桃應是笑劉郎。不辭白首登龍禁。正欲青衫及

鴈行。今夕團樂同醉後。未知何日駕歸航。

靈芝寺

送客靈芝寺。憑欄山有無。自從朝北闕。始得見西湖。煙外移輕棹。波間浴野鳧。清寒不可駐。回首又神都。

閻丘醫視脈曰。老人之脈如小春。有感。

老去光陰似小春。如何比得少年人。君看桃李秋風後。縱有花開不是真。

貢闈對硯盤發歎

老去未忘黃與朱。琢成三硯樂閒居。豈能更作諸生業。但欲頻看後世書。視草北門才已盡。持衡南省計尤疎。便須再挂衣冠去。約汝同歸故草廬。

次韻李孟遠使君與林雪巢子季武詩

古梅巨石瞰清池。觴詠曾陪老啓期。別我遂成千古恨。傳家空有一篇詩。使君尙爾悲陳迹。處士惜非同此時。若使南樓預清賞。胡牀應奉庾元規。

玉堂早起

早起多奔走。旬休亦往還。偶因二士試。始得一朝閒。靈鷲花枝上。金魚荇帶間。素餐終有愧。只憶舊家山。

贈徐松

我爲浮名媿引年。老餘八十尙飄然。不如合卻談天口。歸向白雲深處眠。

經筵講詩徵章進詩

聖主承丕祚。于今歲幾遷。昭回光飾物。剛健位乘乾。善治新更化。當陽獨攬權。誅鉏及共鯨。擢任列閔顛。曩日方謀始。宸心最急先。未遑親政理。首務關經筵。恭儉甘卑室。尊嚴拱細旃。晝居勤已甚。坐待禮無前。講徹詩三百。時逢運半千。諸儒深誦說。六義極摩研。俯閱毛公傳。旁參鄭氏箋。慨尋中古意。重是素王編。舊本三千首。終存十二篇。雖遭煨燼厄。所賴詠歌全。開述因農事。安民在井田。成功時邁酌。興業大明縣。東國思平賦。南山樂得賢。艱難由后稷。勞來美周宣。起自紹熙載。迨茲嘉定年。關雖從擊彼。殷武遂終焉。寵數傳中旨。恩光被邇聯。神文期繼踵。元祐信齊肩。內廐頒雲騎。雕窰絢錦韉。茗分龍焙品。香拂御爐烟。衆俊咸宣力。孤生亦備員。少時曾學詠。老去未忘筌。納祿誠休矣。歸耕久晏然。鋒車俄促召。梓里謂登僊。詞禁容揮翰。天官命典銓。豈知侵暮境。重得侍甘泉。朽質何能報。孱軀殆欲捐。尚思求講諫。海嶽效塵涓。

題天竺珪老復菴

路從天竺更微南。衲子邀余過復菴。八法照人瞻睿藻。一峯當戶擁晴嵐。奇文初動玩義畫。萬物竝觀師老聃。六用不成均此理。楞嚴容我爲同參。

爲倪正甫尙書題壯懷堂扁以詩來謝次韻

久矣君宜任弼諧。果隨驛召上天階。幾年不作相逢夢。一日俄傾積別懷。情厚夫君幾鮑叔。愚如老我類高柴。他時戶冊高懸後。直欲扁舟訪水涯。

攻媿集卷十一

今體詩

送趙德老觀文東歸

趣還宗老侍經筵。宿望訂謨信偉然。引疾屢煩頒漢制。賦歸先已買吳船。去年趨召叨同傳。今日求閒媿著鞭。未得相隨出關去。羨公徒御若登仙。往還不過酒三行。成敗同觀棊一枰。東海敢言成二老。西湖自足度餘生。場來便覺廢茲事。歸去定須尋舊盟。錦里錦坊秋色裏。夢魂先已到江城。

送倪正甫尚書守南徐

君如春柳我如松。晚歲重逢意愈通。日日公餘搜理窟。時時史暇樂談叢。友朋罕有心相照。兄弟惟應姓不同。此別未知何日見。摻祛無語對西風。滿腔忠膜與嘉謨。空洞他無一物餘。有語莫非憂國志。欲行猶上薦賢書。已欣勇退成清節。更喜高眠即故廬。廊廟須公經濟手。不應斂惠向南徐。幾回去國向吳興。出處雖高事不平。茲以優恩臨北固。不妨禁直寓西清。羨君決去行何速。媿我求歸計

未成。溯水東西又千里。壯懷堂上未忘情。

戲題十四弦

十四朱弦欲動時。泛商流羽看搖蕪。弦疏不隔如花面。聲急還同躡馬兒。鶯鶯霜餘繁密網。蒼蛛雨後理輕絲。曲終勸客杯無算。一吐空喉醉不知。

樞密新府

平生苦欲住山間。每恨家居不傍山。游倦忽來參宥密。公餘卻得對孱顏。援琴萬壑自同響。緩步一丘猶可攀。信美終非吾久處。乞身惟待老鄉關。

門號簽書府。心存攻媿齋。倚欄臨曲沼。拄杖看懸崖。槁葉鳴輕雨。殘山擁半階。退公成吏隱。足以暢幽懷。

大雪趙振文寄詩言乘月泛舟清甚次韻

老我心知筆力衰。頗欣臘雪瑞清時。三茅奇觀亦難遇。白玉峯頭燈萬枝。萬玉眞妃搖珮琚。梁園授簡屬相如。莫嫌一水限吳越。兩岸交輝合太虛。雪光絕勝水銀銀。未覺仙家隔一塵。眞境宜君著佳句。賞心樂事更良辰。見說中宵泛綵舟。何人同賞大江流。陽冰伯雪應爲伴。更約禪人白道猷。舊聞老具擅詩聲。夜泛錢塘向鳳城。今日清游更豪逸。雪花和月帶潮生。

法具字圓復。紹興初詩僧也。有月夜游錢塘江詩云。小舟爲我載月色。

白沙翠竹光相射。自從李白下金陵。四百年無此豪逸。

酒邊戲作

末年六十已言歸。七十重來自覺癡。未報君恩歸未許。樽前羞聽摸魚兒。

葉處士畫貂蟬喜神見惠

重煩妙手費丹鉛。貌出衰容信宛然。君看頭顱已如許。豈堪頭上著貂蟬。

頃游龍井得一聯王伯齊同兒輩遊因足成之

路入風篁上翠微。老龍蟠井四山圍。水真綠淨不可唾。一作水從何來不知處。魚若空行無所依。勝處雖多終莫及。舊

游誰在事皆非。祇今匏繫何由到。徒羨聯鑣帶月歸。

海潮圖

錢塘佳月照青霄。壯觀仍看半夜潮。每恨形容無健筆。誰知收拾在生綃。蕩搖直恐三山沒。咫尺真成萬里遙。金闕岩峴天尺五。海王自合日來朝。

題施武子所藏醉白堂記有序

醉白堂記。相臺舊刻已不多見。施武子得太清樓所藏真蹟。一代奇寶也。魏王尙友香山。坡翁詞翰兩絕。畫錦故居。昔嘗以假吏過其門巷。恨不一到其處。太清圖書流傳至此。撫卷無非可歎者。事至今日。歎又不足爲之慟哭可也。

堂名醉白尙存不。詞翰輝光射兩眸。天下曾除蘇氏學。禁中卻有太清樓。舊碑于世已難見。真蹟惟君乃

得收感歎不堪衰淚落。林慮山下水空流。魏王以相州城中無水。于林慮山引水入城。貫第中。溢為灌溉之利。

謝雷季仲樞密惠社餅

寵分餅卷荷深情。割肉烹鮮不厭精。潭府始知嚴社祭。衰門又得詫侯鯖。洗杯用薦逡巡酒。下箸如餐骨董羹。回首粉榆未能去。欲隨秋燕問歸程。

婁彥發參政八月二日壽詩有序

某伏承生申之旦。正得秋而萬寶成。真是一年好處。中秋佳月。浙江大潮。皆每歲所有。芙蓉菊桂。俱不復重陳。今則實惟巖壑所誇。一百省歲之時。況值合宮大禮。儲君受冊。前星誕育。昴宿凝祥。相去只五日間。寶僚惟公為舊學都省後堂。祝壽之儀久不講。此公首當之。今又以慶朝按試鼓吹。嚴更警場。輒成唐律。發樽前一粲。

青宮冊寶盛朝章。玉佩珠旒照日光。儲采久資三善得。生朝相去半旬強。五千餘卷學尤富。一百省年身更康。都省先會同舉酒。貢闈最喜又傳觴。易逢皓齒令歌曲。難值嚴更聽警場。慶事方來真可卜。祝公黃髮相虞唐。

題孫谷橋播間圖

播間不足又之他。猶自施施駟室家。齊國一人如許爾。寧知後日事如麻。因知義利本殊途。莫笑播間乞祭徒。正使往來多顯者。此中尤要著工夫。

肆赦小雨

時章達之樞密在麗正樓上。禮畢。歲謂
余曰。君雖長未免雨立。歸途成小詩。

端門宣赦樂欣然。膏澤還應降九天。始覺耳邊鳴械械。漸看笏上溜涓涓。我班金闕闌干側。君侍玉皇香案前。雨立固知同陞楯。一言猶幸賴優旃。

題桃源王少卿占山亭

納納乾坤一草亭。西山盡見若秋屏。霜餘遠水呈天碧。雨過遙空現帝青。逸叟真成陶令隱。高懷長似屈原醒。肯堂固賴賢孫子。精爽猶疑尙有靈。

題汪季路侍郎所藏吳道子天龍八部

妙絕天龍八部圖。細看真不失錙銖。聲名自足高千古。題品尤難遇二蘇。旌旆冕旒猶可想。鬼神人物亦何殊。君看坐位蘭亭草。費盡工夫學得無。二蘇謂子美。子瞻也。

謝顏樂閒篆籀騷

樂閒下筆素推高。攻媿耽書老更饒。顧我好看秦小篆。煩君爲作楚離騷。晚年應悟成壻匾。痛飲猶堪寫鬱陶。喜劇但知藏十襲。瓊瑤無以報投桃。

題徐聖可知縣所藏楊補之二畫

誰種疎梅古岸頭。推篷瞥見倍清幽。君看竹外一枝好。真有江南萬斛愁。梅花屢見筆如神。松竹寧知更逼真。百卉千華皆面友。歲寒祇見此三人。

嵩岳圖有序

先祖太師齊國公元符中。知河南府。登封縣。建炎兵燹。先集故物。煨燼無遺。兒時猶及見揚州伯父藏嵩山圖。丹青僅存。雖傳錄廿四峯詩。以生晚。既不逮事。不知有石刻也。張致遠爲京西僚屬。寄登封舊碑。得之驚喜。唐律爲謝。

先世前蹤不可追。君從何處得全碑。上橫嵩岳三千丈。下列齊公廿四詩。室號揖仙懷舊事。卷名面壁認遺基。青氈真是吾家物。欲以瓊瑤厚報之。

寫照葉處士求僧

幾年依樣畫葫蘆。自作葫蘆學佛徒。一筆從今勾斷了。一瓶一鉢任江湖。

元日

歲當庚午旦庚寅。最喜明朝遇上辛。五福來臨吳越分。更欣三日卽頒春。

題郭恕先雪霽江行圖

妙絕丹青郭恕先。幻成雪霽大江船。沿流更飽輕帆舉。上水仍勞百丈牽。捩柁長年渾欲動。褰帷佳客若將仙。侍親曾泛滄浪月。猶記蘭成射策年。十八歲時侍先太師行大江。

寄題江西劉氏勤有齋

樸斲敷菑皆用勤。況吾儒者務多聞。萬書插架非關我。一卷入心方屬君。爲學從來無止法。立身寧祇富

多文自憐習氣今猶在。尙欲焚膏到夜分。

書葛氏詩卷詩有致仕心
間適十首

末年六十蚤休官。海角投閒儘自安。一紀時容奉香火。七旬遂許掛衣冠。重來深媿妨賢路。此去終期保歲寒。三上封章歸未得。葛家詩卷卻羞看。

殿上聞杜鵑

衰晚三年侍玉墀。高梧又擢鳳凰枝。封章屢上未容去。更向殿頭聞子規。

王伯齊染髭

垂髭相見舜江濱。荏苒俄驚過五旬。願我頽齡真似葉。訝君長鬣亦如銀。萬金安得神仙藥。一笑重來舊日春。縱使星星還復出。不妨時作少年人。

乞出過傳法聞伯齊歸姚江

扶病還朝一秃翁。重來寧免笑何公。夢魂長是尋雲北。歸路何時向浙東。深願聳身隨畫鶴。空勞舉目送飛鴻。主人竹所終須到。最憶東軒一枕風。

行香聞杜鵑

牆西綠柳杜鵑聲。我老何堪側耳聽。我自賦歸歸不得。不須苦語更丁寧。

送蔣甥若水使屬北行

曾爲假吏到燕山。送子長征不作難。故國能無歎黍黍。中原應欲覩衣冠。黑甜軟飽宜加愛。紅皺黃團正可觀。行矣勿爲兒女戀。指期良月待君還。

夜讀王承家縣丞詩編

向來深夜快揮犀。不聽清談又許時。淨洗昏眸急呼燭。爲君讀盡一編詩。鍊句工深興味長。固知家學富青箱。莫言一樹能嘗鼎。更欲爲余傾錦囊。

寒食

輔政無功日歎然。佳時頒賚屢傳宣。已蒙授粢仍分茗。旣荷貽牟更擊鮮。酒號沈香盛寶棹。燭然新火散青烟。兒孫不識君恩重。但覓東宮賜劇錢。

夫人攜家泛湖

三分春色二分休。始見魚軒泛綠舟。諸子侍行歡盡日。一翁獨坐淡于秋。滿斟美酒應同醉。是處名園爲少留。陰靄在前雷雨後。特晴此日稱君游。

卽事

壯志摧頽貌亦衰。豈知官舍傍巖隈。此身不是京塵裏。飯了沿山看臘梅。

劉寺卽事

不到茲山二十年。豈知重見舊山川。煙深雖不見湖水。且看長空萬里天。

飛泉何事仰空流。無數明珠散不收。注輦昔時曾撒殿。至今拋擲未曾休。

澆發漕薦喜而成詩併勉杓

戊辰貢舉忝余知。會礙孫兒到省闈。欣汝今秋重預薦。喜吾即日可言歸。門闈有慶人爭賀。父子同登世所希。痴望十人俱上第。坐令晝錦倍光輝。

十月旦尙媛用夾公服二月初吉雪寒甚服單

尙媛先添夾。方寒卻用單。不惟春料峭。況值雪飛翻。但欲朝儀肅。難求己分安。衣囊如欲懶。歸去老江干。

從子淮過省寄伯中弟

我家伯父德餘輝。吾弟風標具體微。七葉欣聞五爭奮。四人先喜一雄飛。忍貧老尙甘筆食。教子今方擢省闈。他日雙椿臨六桂。麻衣俱換綠衣歸。

贈僧文可往黃州建東坡寺

一坡久矣郡城東。居士來游地望崇。問舍求田煩作計。拈槌豎拂看談空。共分龐老沈江寶。要奉儋州秃鬢翁。去作開山第一代。燈燈相續到無窮。

三月七日上賜牡丹並薔薇露勸酒

幾見牡丹東海涯。暮年敢謂到京華。休論千品洛中譜。驚看百枝天上花。況有八珍來禁苑。更加雙榼賜流霞。闔門飽暖聊同醉。稽首將何報宅家。

史清翁談詩走筆次韻

公退門庭靜。輕風輟絮毵。故人驚一見。小酌散千憂。西上不容久。東歸又別愁。何當附舟尾。從此遂歸休。

以興安石阮底寄顏樂聞

興安樂石響于桐。作阮猶堪繼仲容。茂苑樂閒真好事。爲君添起玉玲瓏。

觀冷泉亭放水

冷泉淺濁使人愁。開板黃波去不休。岸側細泉穿亂石。始知別是一清流。

贈蜀二史有序

紹熙四年蜀士李德秀甫登科。求致其事以榮親。先帝詔從其請。某時任西掖。預草詞命。今皇帝策士蜀。又有二人焉。同姓史氏。其一蘇州司戶天應與其子篋同登。遂以身之官求封贈父母。其一成都府司戶公亮。自陳素志。晚得一官。亦爲此舉。上益嘉之。各特循從事郎致仕。聖朝孝治之盛。十九年間。見此三人。坤維士風。于是尤振。輒成唐律。表贊喜之私。仍寄后溪劉德修。

老我挂冠慚復彈。羨君登第遽休官。幸哉有子事尤美。專以爲親人更難。舊說三賢皆特操。今看二士倍榮觀。同歸猶及襄陽老。一舸清風廿四灘。

題汪季路尚書所藏米元暉蔣山出雲

龍盤往昔名鍾山。雲起從龍意自閒。膚寸須臾成戴帽。坐看膏雨滿人間。

九月十一日杓孫得男

郡齋弧矢記垂門。今日衰翁更覺尊。生晚不能瞻大父。年高卻喜見曾孫。從今鏡鑷知無用。但喜芝蘭近愈繁。願汝孳孳守家法。爲傳衣鉢到仍昆。

送叔詔弟宰華亭

試邑雲間事最多。直將心力細礪磨。固知三泖五茸勝。其奈千瘡百孔何。敏手未須施霹靂。疲民正欲聽弦歌。規撫穩作三年計。徐上青雲鬢未皤。

又示從子澧

壯縣人歌第一奇。過庭爲有寧馨兒。親旁色養宜加謹。戶外分毫勿預知。寓意杯觴須自節。讀書松竹有餘師。他時刮目相期待。連桂家風望一夔。

寄叔詔弟

阿連試邑有成規。誰謂雲間不可爲。能使鑊湯偏滾處。直如官府太平時。容容非欲後多福。赫赫何如去見思。子路當年曾請益。更須無倦以終之。

朝退

謝事不得去。趨朝愈更難。誰憐八旬老。日冒五更寒。指凍怯持笏。腰酸強踞鞦。細思誰縛汝。只合挂衣冠。
劉德修赴遂寧示和篇改除荆南復寄之

老矣思歸缺屢彈。七旬望八合拋官。我將東去計安出。君欲西還事亦難。好向渚宮尋故蹟。更從雄楚縱遐觀。上游正倚公爲重。莫向蓬谿更上灘。

李起宗舍人悠然亭

遠游蜀道歷艱難。徑上甘泉豹尾間。荷橐忽思辭北省。拂衣自喜見南山。當時旁舍基猶在。回首垂髫鬢已斑。先友碑陰盡陳迹。寒空依舊濕煙鬟。

伯中弟可休堂

夫婦老相對。閨門貧甚安。六兒俱力學。一子幸仙官。香火祠初奉。勳名鏡裏看。更當聯五桂。納祿尙何難。

海棠

海棠昨日始萌芽。一夜驚雷發萬葩。老眼恍然何所得。凌雲庵外見桃花。海棠初發爲題詩。倏見輕紅萬點吹。已惜落英鋪滿地。更憐幾片罨蛛絲。

後圃

春雨才晴氣已和。暖風吹動百花窠。絕憐玉屑如吾髮。綠者全稀白者多。

贈熊道人

十載隱潭衡。居然肺腑清。枯禪參懶瓚。老氣激彌明。筆底煙雲妙。人間勢利輕。款門俄告別。江海一浮萍。

題汪季路尙書所藏米元暉湖山瑞雪圖

筆力誰能似虎兒。思陵親爲御珍題。小臣不識湖山好。但欲扁舟泛剡谿。

揚州瓊花

回憶靈根六十年。秋深恨不見芳鮮。茲從淮上來千里。非比人間聚八仙。曾有畫圖稱小異。諒應后土愛孤妍。或言天杖誠虛語。榮悴中分亦偶然。

題林宗魯校書所藏宣和御畫

周公多藝孔多能。徽廟才高更倍增。除卻萬幾都不會。至今遺老話昭陵。

贈別章茂獻尙書

我輩重來鬢已皤。正元朝士苦無多。才堪柱石猶歸去。奈此摧頽一老何。

戲咏戎葵簇成芍藥

回首閒來婪尾春。橫風吹盡已成塵。戎葵簇就誰嘗巧。紅藥當前太逼真。觀消贈人迷冶子。翻啻得句誤詞臣。園丁妙手有如許。猶勝隋園翦綵人。

戲題膽瓶蕉

垂膽新莖出汝窰。滿中幾莢浸雲苗。瓶非貯水無由罄。葉解流根自不凋。露綴疑儲陶令粟。風搖欲響許由瓢。相攜同到綠天下。別是閩山一種蕉。

午暑

炎官火傘罩中區。病老低垂氣不蘇。難學孫兒頻飲冷。時將冰水洗霜鬚。

省宿

樹滿茅山綠正肥。昏鴉日日向南歸。如今身在三茅外。卻看歸鴉正北飛。

水蕉

獵獵水芭蕉。如將隱士招。清風來處遠。溽暑坐中消。

送楊晦叔提舉浙西竝寄陳表道

兩兩郎星映使星。老人星彩對晶明。褰帷共喜行幾句。洗印仍欣就帝城。五馬況當恩始拜。三吳從此政尤清。便看瑞慶求稱壽。同聽嵩呼萬歲聲。

八月四日晚霹靂碎大柳木

秋分雷自合收聲。白露明朝忽震霆。怪得坐中驚欲倒。鄰牆老柳碎中庭。

靈光

魯邦宮殿久蕪荒。惟有靈光最久長。身似靈光終變幻。巋然別有一靈光。

謝陸伯業通判示淮西小藁

四海詩名老放翁。遺編俱在迹成空。忽從淮右傳詩卷。近比劍南真父風。暫向壺頭追馬援。何當甫里訪

龜蒙江山爲助多佳句。莫惜南來寄斷鴻。

蕉菴清坐

薄晚歸來煙已蒼。蠻蕉一葉障斜陽。不須久住潭潭府。始覺山林興味長。

蕉菴暮歸

綠蕉陰下透斑衣。飯了從容到夕暉。老子才攜筇杖去。孫兒各捧竹團歸。

病告

閉戶垂簾儘自如。兀然終日擁紅爐。得歸足可優游老。此地何堪養病軀。

殿上侍立寒甚

小雪以來霜氣清。今朝寒色倍嚴凝。榻前侍立無遮障。吹得半身真是冰。

齒落戲作

零落殘牙齒。年來落欲空。得魚惟食凍。捨肉只餐葱。休憶紅綾餽。難吞栗棘蓬。何須如劍樹。始解振宗風。

重陽潭生日時年四十九矣

汝生四十九年春。猶記雙親始得孫。當慕知非過能寡。敢言學易道彌尊。喜吾父子爲知己。賴爾詩書遂滿門。但得團圓長似此。年年萸菊醉清樽。

范敍剛舍人示文正公象笏

千載威名文正公。忽瞻遺笏照雙瞳。敢從象齒窺清裁。屢批龍鱗奮大忠。秉立定知端若柱。至今猶想氣如虹。舍人接武登廊廟。宜寶甘棠振祖風。

送黃貞護道人住茅山贈以黑玉虎

少從黑虎谷中行。晚得於菟玉琢成。輟以贈君俱隱處。大茅峯頂看風生。

贈凌一源道人

知君曾住武當山。更解尋幽瀟皖閒。老矣無緣窮勝處。但思歸去臥鄉關。

謝滕宰彥可惠詩

與君相遇海東頭。明月如何忽暗投。自媿重來千歲鶴。永懷靜對五湖鷗。新編不覺成三復。妙思誠堪比四愁。還肯來遊鄧山否。與君攜手上東樓。

薊林雪中過峽圖

不士之里無言詩。泛雪清圖事已非。墨隱爲君傳舊跡。宛然興起剡谿西。

賀監湖上

萬頃平湖一葦杭。此歸喜似賀知章。上恩賜與西湖曲。遂老吾家歸照堂。狂客歸來終好夸。越王城下占烟霞。此中信美非吾土。不似西湖是我家。

攻媿集卷十二

今體詩

殘月如新月

近晦月猶在。蕭騷夜向晨。已殘幾欲盡。忽見恍如新。老桂沈清影。餘輝鉅半輪。纖纖兩頭玉。皎皎一鉤銀。明似哉生際。光疑太逼真。妝樓誰起早。深拜誤佳人。

炙背俯晴軒

炙背情方適。融霜日正暎。何妨憑曲几。相與俯晴軒。愛景欣亭午。閒身得負暄。映簷成白醉。挾纈謝奇溫。豈止寬寒色。猶思奉至尊。桃花滿肌骨。佳句憶王孫。

置酒沛宮

漢祖功成後。時因過沛宮。還鄉上心喜。置酒故人同。高會延遺老。酣歌和衆童。窮歡新笑樂。起舞舊英雄。慷慨悲遊子。軒昂賦大風。永爲湯沐邑。何用築新豐。

天寒割蜜房

場圃功初畢。天寒樂歲穰。山居收蜜課。簷外割蜂房。弱羽依晴日。纖腰怯曉霜。鉛刀開戶牖。棘匕薦甘香。

作室何時再趨衙未用忙。百花辛苦處。今日爲君嘗。

黃知橘柚來

一舸放長江。遙林底處黃。自知來橘柚。先已照滄浪。綠葉凝煙密。金苞射日光。相迎蒼縣雨。暗識洞庭霜。味詫江陵種。庭垂禹廟荒。何如船上看。數里更飛香。

背水陣

十里當勦敵。臨機事寔危。草山兵已遣。背水陣尤奇。前澤書誠有。行權我獨知。正須投死地。何用惜羣疑。拔幟終如約。傳餐亦應期。孫吳非紙上。方略要從宜。

鯤化爲鵬

鯤大幾千里。揚鬣氣日增。一時俄化羽。萬古記爲鵬。鱗族疇能比。龍門不足登。天池將轉徙。雲翼快飛騰。怪矣齊諧志。壯哉莊叟稱。鳶飛與魚躍。曾不事誇矜。

一月三捷

勇甚鷹揚將。身從虎穴探。六師心不二。一月捷凡三。戎卒時非久。邊庭戰已酣。神戈窮逐北。露布屢馳南。貔貅彌思奮。狼心敢肆貪。七旬有苗格。較德可無慚。

清泉潔塵襟

騷客事幽尋。清泉一派深。居然浮爽氣。聊用潔塵襟。徹底明蒼翠。澄波漾碧岑。應添山澤趣。盡滌市朝心。

洗耳何妨聽吟詩更喜臨。至哉天下樂。穩坐讀書林。

物色訪嚴光

肥遯推嚴子。招賢仰漢光。營求思舊學。物色訪羣方。聘問期終得。形容尙未忘。羊裘方審識。蒲乘遂搜揚。不羨雲臺繪。還歸釣瀨傍。高風今尙在。江水與俱長。

冀北馬羣空

冀北雖多馬。知惟伯樂工。祇因良種去。便覺舉羣空。遍視千蹄衆。先收八駿雄。漫聞餘布野。無復見追風。騏驥方奔逸。駑駘豈混同。倘非承一顧。鳴意孰能通。

習馬長楊

強漢承平後。兢兢武不忘。整師臨五柞。習馬向長楊。冀野來騏驥。天閑出驕驄。驤騰射熊館。馳驟華山陽。輦路千蹄穩。瑤池八駿良。上方勤閱武。願賦翰林章。

飛泉漱鳴玉

翠巘幽深處。飛泉觸石鳴。跳珠無定態。漱玉有餘情。雨落千尋溜。風傳萬壑聲。玲瓏鏗璧韻。激濺破瓊英。漢水思遺珮。滄浪想濯纓。何須韓吏部。聯句賦琮瑋。

表兄陳安行遷右司仲兄遷大理丞余遷太府丞舅氏適齋寄詩爲賀次韻

東塾談經歲月輕。外家生長復何營。王生此舅若無有。楊惲一書安得成。首寄新詩欽厚意。卻思往事念

平生當時更荷外祖母幼惠尤憐盛氏甥。
爲親敢說宦情輕。公退委蛇懶自營。朝路一時借寸進。適齋新句已先成。圍師況復今同里。武子非惟愛
外生。舊日阿童今欲冠。此恩更欲到彌甥。

適齋挂冠次韻

致仕吾非不待年。禮經自合許求田。祇圖徑取衣冠挂。不願更尋香火緣。富貴鼎來先避地。是非叢處獨
翩然。鄧峯相對兩真隱。共仰元台爲大天。
世事相牽無了期。平生待足是何時。拋官不作九閭夢。納祿尙餘三徑資。紫綬金章寧復戀。黃冠野服自
相宜。耳根贏得長清淨。理亂從今用不知。

余初除西掖適齋惠詩以二甥相繼續繪爲喜安行表兄貽書喜溢于辭謹次韻爲謝竝屬安行
漕臺生處寢之牀。叢桂還分一葉芳。紅藥階邊懷老謝。桃花觀裏憶劉郎。首煩賢舅書增喜。想見慈親色
更康。無忌安能真酷似。願從外氏借餘光。
敢謂封綸據此牀。幸從科級紹餘芳。紫薇繼直中書貴。叢桂猶爲同舍郎。太史書傳得楊惲。渭陽情厚爲
秦康。外家宅相君餘事。魚目何堪比夜光。

余白郡得娶適齋以詩相迎次韻

風際端宜鶴退飛。青雲高處有危機。屢遮西日成何事。幾向東風詠式微。塞馬云何真是福。鱸魚正不爲

知幾休論池上翩然舉。且奉潘輿得賦歸。

適齋約訪王卿正己已而中輟次韻

歸來親戚話通情。準擬流光得再行。已荷適齋容接武。敢從酌古遽渝盟。烏衣門巷人非遠。綠野樽罍計未成。官已得閒身未暇。因仍忍或過清明。

謝太守送雪次適齋韻

一冬祇見曉霜寒。未得飛霰萬里看。多謝黃堂贈圭璧。欲從乳竇倚欄杆。簾高安有冰成柱。坐久空餘水在盤。歲晚願呈三白瑞。要觀積玉滿林端。

清高閣觀雪次適齋韻

衝雪上層閣。眞成清且高。主人風節峻。坐客笑談豪。泛棹訪安道。賦梅思水曹。好因臆映夜。痛飲讀離騷。眞率會次適齋韻

喜奉潘輿得退身。烏衣相會總情親。樽前正好醉千日。林下何妨見兩人。閒暇止應開口笑。談諧尤稱掇皮眞。夜歸更作驚人語。舅氏從來筆有神。

楊聖可基集余方歸自桃源不及預次適齋韻

屏處尤便野性情。故人何幸得相逢。賦歸敢慕陶彭澤。自免猶希邴曼容。基酒交歡情正洽。江山得助景方濃。嗟余誤入桃源去。歸路滿城聞晚鐘。

汪達可招遊臧園次適齋韻

城下名園稱老懷。乳鶯飛燕共低徊。寒梅送臘曾先到。嫩綠留春喜再來。眼底芳時能幾許。樓頭衙鼓漫相催。主人好事不嫌客。素壁揮毫又一回。滿架醅醱愜雅懷。更添林下紫徘徊。平湖不怕重門阻。勝賞何妨後日來。酒興已隨斜照遠。詩情無待片雲催。黃昏鼓棹欲歸去。望望烟林首重回。

士穎弟作真率會次適齋韻

何羨祖希情好隆。朱陳累世意交通。鼻錫巾屨頻相接。兄弟樽壘喜更同。參坐幸容攻媿子。主盟全賴適齋翁。日來愈得清閒趣。斗酒不妨時一中。

弔王卿之喪次適齋韻

去歲同登百尺樓。相期春晚更重遊。舟藏大壑夜俄去。橋跨清溪花自流。五紀情親真是夢。四山風物總成愁。一朝千古尙何及。空使文皇嘆薛收。

喜雨次適齋韻并呈郡守吳居甫

一旱禱而雨。此心天與通。爲霖三日足。起舞萬家同。破塊朝方爽。翻盆夜正中。隨車真響應。巫覡又何功。洗印日無幾。載芟春已移。龍神來鄴嶺。香炷燕流陂。自是受廬許。堪爲學稼遲。洋洋添野水。已足樂吾甬。雨師爭自效。風伯尙何施。膏澤由分闕。空餐愧奉祠。農功今可濟。水利更無墜。喜雨無煩記。行人口似碑。

安行表兄除華文閣直學士奉祠次適齋韻爲賀

屢報銀臺給事中。忽聞喚渡浙江東。長安幸免手遮日。圓嶠莫嗟船引風。廩繼真祠身暫逸。班聯內閣香方隆。且歸同伴適齋老。便看鋒車召此翁。

送安行表兄葬次適齋韻

深沈仙洞鎖神清。萬壑松聲不似晴。宿草他年空悵望。生芻今日寓精誠。山川氣象渾如舊。劍佩風吹儼若生。猶記玉音稱酷似。始知無忌乃其甥。

尋春次適齋韻

一自東皇天上來。坐看芽蘗起枯荄。化工潛有洪鈞轉。春事何勞疊鼓催。晚景鬢凋寧再綠。去年花謝又重開。賞花攜酒那容緩。走遍郊原莫便回。曉來陌上雨班班。同社相將便出關。席地亦堪尋酒所。得園徑與坐花間。從教多病須行樂。任是清貧也破慳。門外紅塵深幾許。誰人能得此身閒。

次適齋韻十絕

休官

人生寧問草堂資。乞得閒身且徑歸。慚媿舅甥俱就隱。淡然相對兩忘機。

發書

故人惟賴幾行書。今日誰能更訪吾。奮日熱心今就冷。向來已自得揶揄。

見客

客至何妨送與迎。門前羅雀亦人情。可憐寒士猶相望。時有饑來柳絮輕。

出謁

杜門卻埽寢多時。閒傍人門亦漫爲。茶竈筆牀烟浪去。自疑身是老天隨。

赴會

此身未老已先閒。到處時時盡醉還。更欲相邀蓮社客。共尋精舍上孱顏。

病起

老去情懷百不宜。上樓腰腳覺舒遲。適齋異稟人難及。病起精神略不衰。

安心

但使心如水在槃。坐令四體自然胖。有人來問安心法。將汝心來爲汝安。

讀書

佚老無如大字書。聊將遮眼度三餘。有時忠義忽相激。間遇包胥與子胥。

染鬚

染鬚欲學少年時。笑殺當年榮啓期。公道世間惟此耳。年來猶幸不相欺。

修養

聞道壺中別有天。能將俄頃比千年。千年俄頃俱成夢。只任天真卻晏然。

同年鄭貴溫寺丞直華文閣致仕次適齋韻爲賀

先生久矣愛吾廬。絕勝揚雄宅一區。賸有珠宮來海石。不妨茅屋繞畦蔬。來書已許尋前諾。結社方將約並驅。更欲相邀預真率。車公豈可座間無。

倦遊歸騎自吳門。欲上封章叩帝關。俞旨肆頒旌素節。華文進直示優恩。淵明妙句羣賢和。疏傅佳名萬古存。加我數年祈謝事。此心難與俗人論。

次適齋韻四絕

初得曾孫女

外子惟知媿可攻。羨公八十未衰癯。曾孫喜見新文褱。尙想當年擲鏡翁。

茉莉花

江南創見喜孤芳。見說閩花徧海鄉。安得一居香盛處。帳中巧作寶毬妝。

從子澡滌築居荷池上

樓臺牆宇家家月。楊柳荷花處處風。最喜兩涯相映帶。一時倒影入池中。

山亭納涼

不嫌西照爲朝曦。城郭誰知住翠微。天幸外門纔咫尺。欲陪杖履夜忘歸。

次適齋韻五首

山行野老問年

田夫笑把褐衣牽。莫問壺中別有天。齒髮雖殘渾未覺。精神愈勝果何緣。公言已老偶能爾。我本無心只自然。再禱百分纔及一。定因椿壽八千年。

堅鄭貴溫基社

二公休致我來歸。儘可同裁隱士衣。此已屢謀登竹所。君其無吝造城扉。人間厭見手翻覆。樂處須當頤指揮。涼氣一新宜近酒。盍簪莫似向來稀。

秋涼有感

公看魚躍與鳶飛。鶴脰雖長斷則悲。世事不容人苦較。秋風自有葉先知。青奴難免交新絕。素扇寧須手自持。宋玉賦篇終未達。不如老子笑成詩。

論悲秋者

黃雲萬頃一時收。喜見高空風露秋。歲事及今將告畢。人生到老盍歸休。固知景物能興感。亦有癡人苦過憂。胸次果然無一累。豈容秋月使人愁。

舅甥賡酬之樂

神明未覺晉公衰。老母尤忻兄弟怡。范甯王忱無許壽。牢之無忌不聞詩。秋風對酒勸酬處。夜月乘橋來往時。但要兩家同此適。不須更遣外人知。

八月十四夜攜家泛月次適齋韻

月到平湖金作波。一城惟此占秋多。水晶宮裏清無比。何用重登漢馭娑。九秋風月正分平。盛滿水晶分外明。老子此行端不惡。夜深幾得聖之清。稍先一日是中秋。行徧芙蓉與菊洲。作意安排卻非適。不如乘輿徑行舟。猶記年時看水嬉。不如此夜月相宜。仙翁一醉非塵世。爲問姮娥知未知。草草真成一段奇。比鄰非不借餘輝。板輿何敢侵風露。略望簷間且勸歸。

次適齋韻十首

懶學仙家煉火還。但欣晚節在林間。駕行免奏三千牘。鶩駕難參十二閑。短艇有時浮綠水。輕輿到處賞佳山。莫言冷淡爲生活。冷淡終然無後艱。秋來病體費支吾。深閉柴門臥草廬。藥裏多尋醫者問。酒樽寢與故人疎。特須勉強陪來客。未免辛勤答遠書。此外儒生真氣習。簡編猶欲趁三餘。大率舟行岸自移。機緘何必更相思。雨餘坐見水三尺。雲淨喜看天四垂。荷沼已殘霜後蓋。桂林初綻日邊枝。閒中氣味深長甚。問卻西風總不知。

幸堪擊壤樂清時。衰病情懷百不宜。祇好灌畦陪漢叟。更欣學圃慕樊遲。逢人草草須傾酒。得韻忽忽且和詩。琴意高低猶自適。高山流水久心知。甥舅相尋向酒邊。相忘情話更怡然。人言難遇雙延閣。自媿叨聯兩大天。只覺光陰詩裏過。何妨枕簟醉時眠。此中別有真消息。莫爲人間醒者傳。

從來憂道不憂貧。晚向閒中得此身。直把宦途如夢過。任他世事似碁新。坐間可說舊時話。眼底幸多同社人。廣唱本求閒燕樂。莫誇末路費精神。

自憐鶴髮奉慈親。舅氏還欣託比鄰。已向雲間收倦翼。甘從波底作潛鱗。果然松菊連三徑。誰謂神仙隔一塵。野服相從成二叟。不須更現宰官身。

笑他咄咄向空書。既老投閒計未疎。釜裏有魚長自足。門前無雀是吾居。休論仙子生塵襪。莫問高軒織翠裾。百念已如灰樣冷。更無驕色與人鋤。

秋宵坐到玉繩低。歷歷明蟾數桂枝。重露半翻蕉葉徑。好風時颭荳花籬。不妨起舞弄清影。何用撞鐘誇小詩。濁酒困人垂欲睡。更揩病眼一揚眉。

秋到先生舊草堂。涼飈林葉已飄黃。漸看天宇清霜肅。更覺人家白晝長。歷世已經三折臂。坐愁何必九迴腸。世間舊事消磨盡。祇有詩情未遽忘。

三年此日綺筵開。盛意勤拳不待催。豫約行人須已集。先欣數客肯俱來。詩筒纔到先廣韻。酒興方濃莫算杯。更欲秋深窮勝跡。鄒枚後乘可容陪。
花若開時定自開。芳心深靚不容催。上人又有新詩出。佳客應尋舊雨來。樓上已聞香撲鼻。堂前儘放酒盈杯。高燒銀燭照花睡。便到更深亦願陪。
定數無過偶與奇。達人循順更安時。不于椿菌量長短。豈爲彭殤較疾遲。雖是一時身有疾。行開九秩壽無期。外生六十頭先白。杖履相從最得宜。

戲和適齋絕句三首

脫索

纏縛千遭趁酒巡。環觀巧手競稱神。莫言名利如韃鎖。猛烈抽身亦在人。

藏壓

儘教邊技儘多般。畢竟甘心受面謾。解把人間等嬉戲。不妨笑與大家看。

傀儡

假合陰陽有此身。使形全在氣和神。王家幻戲猶堅固。綫索休時尙木人。

晝寢正酣適齋以二十韻詩來亟爲次韻

老氏正求知我希。吾今老矣更何之。極知仕宦皆由命。縱有功名已過時。覽鏡形容寧復我。還鄉交友定

從誰慈親多幸方難老。舅氏猶欣未覺衰。教誨至今仍似舊。襟期暗合自相知。新詩必使篇篇和。勝地還容處處隨。晝永劇談俱喜聽。夜深清坐更忘疲。素欽行己初無玷。願學持心不自欺。紫橐清班叨預列。黃金橫帶忝同垂。六旬顧我猶加懶。八秩如公尙自持。但仰三尊知共慶。孰云十拗敢輕嗤。無情到此方爲達。省病從他不用治。世事只將同蝶夢。人生幾得見雞皮。觀書自識非求解。策杖徐行莫厭遲。儉素何妨貧勝富。優游真是樂忘飢。雖然調樂無千指。儘喜當歌有十眉。報謁要須親自到。赴筵直以散爲期。醉翁雅意非謀醉。基社清歡豈爲基。白髮只宜甘散誕。紅塵任彼自奔馳。安輿來往常陪伴。此意終身誓不移。

次適齋贈少微兄韻

汪樓比屋古城隅。彼此清貧不願餘。南阮諸賢今有幾。東牀佳壻竟誰如。歸鄉年亦非全老。對酒情猶未覺疎。來往兩家無倦色。此身端合老犁鋤。

桂花方開約客次適齋韻

久疑岩桂儘遲開。留待來朝伴舉杯。老去欲尋千日醉。客來同引百花醅。況臨高閣枝枝秀。好判閒身日日陪。家釀盡傾君不惜。莫教瓶罄恥爲罍。

蔣德尙基會展日次適齋韻

基社經年能幾回。身閒深幸屢參陪。一旬又見朋簪集。三徑還應聽履開。休苦索居徒面壁。何知相遇且銜杯。雖由藥裹寬初約。不礙重尋舊雨來。

太上皇帝聖體清康老母進封信安郡太夫人適齋除敷文閣學士有詩爲賀次韻

清朝孝治古無倫。通籍推恩總及親。八秩升班惟二老。九齡拜命更何人。春初慶席歡猶在。歲晚宸綸喜共新。須信長年多富貴。祇因同見會昌春。
吾母年高絕等倫。癡兒何幸得榮親。九重錫類真千載。八座承恩只一人。共仰外門流慶遠。喜同介弟寵光新。兩家盛事人爭賀。和氣薰爲臘裏春。

題曉上人閒靜軒次適齋韻

我居城郭子居山。兩地相望數里間。我已得閒猶未靜。子雖處靜不曾閒。莫將花與夢相似。只用心如石樣頑。要識箇中真信息。孤雲僧事兩相關。

次適齋韻十首

暮會

歸來鄉曲大家閒。同社仍欣取友端。無事銜杯何不可。有時會面亦良難。少曾環坐坐常滿。賴有主盟盟未寒。琴弈相尋詩間作。笑談終日有餘歡。

老態

身退不爲遲。肥遯猶當未老時。東晉雖慚古元亮。晚唐知慕老天隨。公開九秩身方健。我甫六旬心已疲。不敢自言成酷似。腹心惟喜兩相知。

晨朝懶起

坐見一翁兩鬢皤。只贏曉夢到無何。臆涼風透真成適。日出事生還更多。足弱已難堪蠟屐。齒搖初不爲鄰梭。回思螭陛班心處。日日奔趨向馭波。

見客

車轍常多長者臨。相過肯笑席門深。寒暄固有三分話。臭味還傾一寸心。客至自應閒不厭。年來寢覺老難禁。應酬旣了無餘事。面壁何妨學少林。

晝寢

才盡甘爲世所捐。不如高臥了餘年。時逢毀譽心無諍。間有詩文手自編。老去已知身是夢。閒來更得酒中天。簾深午寂渾無念。只與白鷗相對眠。

喜閒

投閒時以醉爲鄉。人旣相忘我亦忘。雨足已期南畝熟。風清更愛北牕涼。晝觀碧落雲千疊。夜看中庭月一方。時撫素琴聊自遣。誰能更作鳳求凰。杜陵鄭老共襟期。門外紅塵勿預知。近日頗荒攻媿課。多時不見適齋詩。竹深荷靜相留處。月白風清偶會時。地僻衣裳俱自懶。黃冠野服淡相宜。

讀香山詩

詩到香山不計篇。相逢佳處輒欣然。明知無子可傳業。每遇爲文自入編。舉世慕名多諷誦。惟公著句得純全。胸中相似詩方似。一等不爲名利牽。

卽事

旋插杉枝蔽曉曦。緩搖輕篋自融怡。調琴不用求成曲。得句何須湊作詩。無復趨炎同襪襪。但能尋睡學希夷。太倉日糴五升米。老矣不嫌人更嗤。

西山


兩岸杉松翠蔭長。輕輿連日得徜徉。絕憐林下朝還暮。不問人間炎與涼。睡起閒情方自樂。齋餘歸路未須忙。何時更向月溪去。願著青鞋走侍旁。

燕居

大老今居東海濱。燕居晚歲更申申。外生但喜長依教。一笑相從莫問貧。閒裏只將詩作活。酒邊猶有筆如神。乞言授几俱休論。且做羲皇以上人。

子成兄年八十六。史子久八十二。舅氏八十八。會于適齋。次適齋韻二絕。

堂中三壽喜同時。黃髮相逢齒更兒。參坐共談宣政舊。風流不許後生知。閭里舊遊能幾人。適齋猶有筆如神。莫言二老升沈異。各現宰官居士身。



攻媿集卷十三

今體詩

陳文懿公居仁輓詞

衆口推文伯。何人識吏師。義襟惟古有。心地只天知。至死終無玷。平生本不欺。在公無可憾。猶恨哲人萎。
珍館徑歸鄴。人猶望秉鈞。郵傳千里計。哀動五州民。躡踊森賢嗣。攀號感路人。公乎不亡矣。袞袞看簪紳。
宅相惟公久。伊余忝後塵。十年追桂籍。兩禁踵詞臣。接武參吾舅。承顏奉老親。幸成三學士。何意失斯人。
一別屢經歲。歸舟已及門。方期情話悅。空訝語音存。善行傳千載。蕪詞愧九原。傷心歌楚些。無地可招魂。

丘文定公密輓詞

謀國規模闊。絕人才具高。三朝千載遇。四海一身勞。儒將通鴛序。樞庭握豹韜。皇家資柱石。天遽奪伊臯。
初擬文翁化。誰知懷遠圖。廟謨專制闢。世將易兵符。養虎竟遺患。斷蛇由不殊。寧同死諸葛。空恨失吞吳。
處事拘擘外。鋤姦談笑中。幾年亡主將。全蜀賴明公。畏愛盾衰日。清和夷惠風。屢書終不盡。詩意亦何窮。

王忠文公十朋輓詞

夙負敢言氣。輸忠不愛身。劉蕡仍遇主。綺季更憂民。治行真循吏。風稜古諍臣。搢紳千載恨。不得究經綸。

梁木今其壞。誰能問大鈞。恩深兩宮賻。哀慟四州民。已矣天人策。傷哉社稷臣。吾生良可恥。不及見斯人。

婁忠簡公機輓詞

壯歲志先定。蒼年氣不衰。治高爲縣日。名重佐州時。雅望登朝著。忠言徹帝墀。亨途日千里。闊步不容遲。邊事覺初開。惟公論不回。深謀比婁敬。極力阻王恢。兒戲何堪用。冰山忽已摧。朝廷始更化。大老盍歸來。共政三年久。蜚英四海尊。色詞無假借。風裁弭囂喧。但欲持公道。寧容啓幸門。經綸終未究。猶有典刑存。寮案侍儲闈。如公久任稀。載欣商皓起。終惜漢疏歸。問字煩參訂。談經賴發揮。一書真總要。星日重光輝。得姓共東樓。同朝兩故侯。文編叨二序。誕日頌千秋。老矣俱宜去。公乎不少留。來書墨猶溼。展讀淚空流。

程文簡公大昌輓詞

論著大哉堯。英聲早已昭。橫飛欽遠業。特立仰高標。言議超千載。風猷聳四朝。惜乎經世學。不及珥金貂。太上崇耆舊。龍鱗手可攀。胡爲遯荒野。竟復老商山。漢閣頒綸渥。瀛壖擁旆還。靈光遂陳迹。西望涕空潸。設卦探羲畫。隨山究禹謨。仰天真見象。畫地可成圖。健筆凌前輩。殘膏浹萬夫。登門嗟最晚。猶得覘宏模。

楊武恭王存中輓詞

歷數中興將。誰爲第一功。兩朝忠衛士。四海雅推公。富貴無危溢。哀榮有始終。吾知尙遺恨。不見朔庭空。勇氣真虓虎。仁心劇放鷹。推鋒多折馘。解縛屢招攜。細柳門堅閉。長楊馬不嘶。夜深星忽墮。何處問撐犁。父祖成完節。丹心激懦夫。枕戈梟逆首。撫劍志伊吾。忠孝公何媿。哀榮世所無。從今紫荷囊。接武上亨衢。

王爵報元勳。臨危更致身。鯨波飛戰艦。狼子歎江神。木落淮南暮。塵清塞外春。功臣誰第一。圖畫在麒麟。

沈憲敏公樞輓詞

天使魁鄉薦。上令卿改官。蚤峨烏府豸。終著侍臣冠。持節威行惠。專城猛濟寬。紹熙多舊學。胡不相宮端。仕宦接王楊。諸公嘆老蒼。門生多紫禁。子舍屢黃堂。自得垂車樂。誰傳卻老方。桃花千樹滿。空憶舊劉郎。徐邈今非介。申枏焉得剛。立朝無附麗。受謫更芬香。戲綵衣冠盛。園棊日月長。典刑今已矣。無復歸靈光。持論真遺直。操心本至公。贏貨寧市寵。平寇不言功。光祿文階峻。嘉興色養豐。誰能死生際。猶得教之忠。晚出荷公知。登門未覺遲。通班依漢棗。試郡守蕭規。藻翰猶頻寄。宮牆不再窺。新阡何處是。西望不勝悲。

林正惠公大中輓詞

愛直趙清獻。忠文范景仁。累朝推舊德。今日見斯人。正色欲劄上。敢言寧顧身。紫樞方大用。惜不究經綸。去國名逾重。還朝道益尊。清虛懷骨鯁。嚴冷帶春溫。公綽真無欲。臧孫尙立言。騎箕雖永隔。精爽儼如存。凜凜古循吏。堂堂真巨公。死生忘度外。邪正炯胸中。憂世心誠切。籌邊事已空。龜潭山水下。流淚與無窮。

觀文殿學士陳公駉輓詞

台嶽鍾神秀。居然社稷臣。海涵書萬卷。魁冠數千人。南服頻懷綬。西垣屢演綸。惜哉真漢相。不遂秉洪鈞。幾見衣冠偉。終聞羽翼成。先皇崇舊學。大政任名卿。神器親傳授。崇朝再太平。功成身自退。寵利一毫輕。朝著登門久。詞林辱眷深。代言稱據古。議禮許同心。去國臨歸路。還家寄好音。病中聞赴告。老淚動盈襟。

觀文殿學士趙公彥逾輓詞

千古盛周宗。皇朝實比隆。謂多擔貴爵。誰見立王功。一語國先定。寸心天與通。龍飛稽事實。信史詔無窮。授受唐虞際。從容平勃間。宗英誰柄用。人望屬棊閒。晚侍經閣讀。寢登祕殿班。帝鄉留不住。歸去老湖山。麾節稱循吏。三朝藹政聲。治如黃霸最。心慕伯夷清。諸道俱遺愛。兩川尤著名。起家臨制閫。更羨錦衣榮。聽履領簪纓。忠言徹帝庭。公方扶日月。我亦寄雷霆。憂世形辭色。臥家存典刑。靈光更陳迹。楚些不堪聽。

端明殿學士汪公應辰輓詞

制閫詩書帥。公朝侍從臣。身能全進退。人可得疎親。曳履聲猶在。持衡迹遂陳。從今幾百載。更復見斯人。蚤歲聲名大。婆娑始遇時。難兄屏隔坐。令子桂芳枝。人望還爲用。天胡不憖遺。成踐堪喻大。墮淚不須碑。道學不盡試。功名祇緒餘。立朝惟正色。薦士有遺書。百贖嗟無及。九京誰與居。莫酬推轂意。哀淚溼巾裾。

端明殿學士張公杓輓詞〔案〕杓舊訛杓。今據宋史本傳改正。

籍甚張京兆。精神滿腹中。才高解牛刃。手敏運斤風。河澌恩波遠。塵閭狡穴空。章臺舊時柳。無復映金絨。英略古無對。外庸今最良。衆方期共政。人已歎云亡。不聽尙書履。猶懷太守章。匡廬星忽墮。丹旆梟清湘。昔幸參朝列。于公更有連。規橈包世界。風義薄雲天。送別詩猶在。貽書墨尙鮮。偉人無復見。惟務寶青氈。

仲舅敷文閣學士汪公輓詞

籍甚宰之舅。難追宅相風。惟公能愛我。獨我最知公。潭府書無繼。西州事已空。形容盡心力。庶或慰幽宮。

外氏桂成叢。諸甥長養中。名稱無酷似。宦達偶相同。澹室既長往。適齋俄考終。絕憐三學士。只賸一衰翁。

樞密謝公廉然輓詞

臣主一意合。風雲平地生。立朝專論諫。爲國總樞衡。行矣登三事。悲哉奠兩楹。輟瓜瓜恩意重。終始備哀榮。千古台山秀。名流列鴈行。惟公登政路。一旦破天荒。故里空華屋。佳城映夕陽。送車無路到。東望淚浪浪。

尙書尤公表輓詞

敏甚五行下。毫釐恥不知。千人揮筆陣。萬卷納須彌。有夏傳遺蠹。先秦拾斷碑。鄭侯書插架。分付稱家兒。憂國言多切。回天力有餘。衆推真學士。上念老尙書。直道終難進。高懷只遂初。梁溪釣游處。此意竟何如。舊學方登用。公來領從臣。末光依日月。聽履上星辰。共政將圖奮。騰章屢乞身。甘盤終罔顯。雨露未霑新。北面願師承。東臺拜老成。忘年寒未坐。敝製若平生。風月吟千首。雷霆寄一名。送車無路到。寒涕爲君傾。

尙書湯公碩輓詞

先正真良弼。形輝四拜麻。決科承奕世。擢藻擅傳家。禁路優特禮。侯藩幾建牙。相門宜出相。恨不見隄沙。奏邸崇先契。周旋右括州。殿庭觀唱第。海郡繼承流。方快飛騰上。俄聞汗漫遊。鳳凰山下路。丹旆想悠悠。

尙書張公抑輓詞

文靖饒風度。高皇記曲江。賢孫真是似。才氣號無雙。幾見詩成藹。終看擁碧幢。誠齋主詩社。到此亦心降。撫字推循吏。論思領從班。宏才名北闕。高興屬東山。同歲叨崇篤。比鄰足往還。舊遊成昨夢。哀涕不勝潸。

商侍郎飛卿輓詞

矯矯眞御史。風生白筆端。出持膚使節。始著侍臣冠。給饒鬢先雪。籌邊心爲寒。天乎驚玉折。不及上金鑾。所至仁聲著。甘棠幾去思。敬姜嗟哭子。伯道痛無兒。郎省傷連壁。文闈見刻辭。邊民紛墮淚。忍讀峴山碑。

顏侍郎度輓詞

宴坐勿菴上。歸顏亦是顏。平心眞似水。立說信如山。屢擁皇華節。重登清禁班。始終無玷闕。風裁許誰攀。祿養嗟何及。朝朝飯一僧。移忠躬蹇蹇。錫類日蒸蒸。報政優吳郡。知賢仰阜陵。清忠與公恕。餘慶啓昆仍。贅倅丹丘日。眼看康濟泉。同朝叨獎與。侍坐得周旋。妙畫多傳寶。遺文合細編。典刑今已矣。西望涕潸然。

曾侍郎奕輓詞

文獻南豐裔。源流曲阜公。巖巖雙法從。凜凜舊家風。金玉方交映。人琴忽併空。平生心地直。流慶尙無窮。紫陌尋春日。惟公最少年。鱣堂慚隗始。熊軾媿盧前。寄我書猶溼。思君迹遽仙。同登今有幾。揮淚撫遺編。

少保李公孝友輓詞

戚聞疏恩厚。勳門積慶餘。弓彎飛將臂。架插郝侯書。六蠹秦官重。三槐漢相如。惜哉終半百。聞者爲歎歎。

錢殿撰佃輓詞

雋譽蜚庠校。孤忠動冕旒。救荒心欲斷。憂國髮先秋。惠滿長江水。風清八詠樓。禁途交一臂。人物等閒休。粉社歸來晚。脩然得故吾。哦詩頻刻燭。點易細研朱。有淚悲連壁。無階奠束芻。名門餘慶遠。丹穴看奇雛。

趙待制粹中輓詞

明主晝三接。清班歲九遷。一居周柱史。徑入漢甘泉。批敕嚴東省。掄材上小天。平生經國志。惜不冠貂蟬。詩近劉賓客。手追歐率更。雙旌古良吏。萬卷老書生。世諦浮雲薄。生緣曉夢驚。吁嗟東向議。何日遂施行。半世誰知己。登門意氣傾。交情忘父行。文會忝余盟。持論先忠厚。談經嘆老成。幽光誰爲發。落筆淚縱橫。

吳待制博古輓詞

御史再乘聰。忠言沃帝聰。處心平似水。疾惡迅如風。遇合嗟何晚。論思信有功。惜哉辛佐治。竟不到三公。三仕入儲闈。堂堂夾日飛。初同四皓起。終作二疏歸。冰玉清班近。衣冠盛事稀。聞君忽仙去。西望是耶非。東甬預賓興。文闈賴主盟。菲葑無下體。衣鉢有門生。劍佩今何處。樽壘空復情。自慙無報所。老淚爲君傾。

楊待制王休輓詞

望重威無怒。仁深勇有餘。百年憂國志。滿篋薦賢書。德政不勝載。才猷未盡摭。佳兒人物似。真可大門閭。蜀道名天險。馳驅敢憚勞。劍頭懸六印。夢裏益三刀。漢殿聯簪橐。燕山擁節旄。惜哉覘國意。不得試龍韜。蜀用東南彥。皇家屬意深。貳卿頻報政。上相最知心。泛宅俱杭葦。同朝擬斷金。廟廊期引類。疾病兩侵尋。事契因同薦。交情晚益親。半生文會少。萬里宦游頻。別後書猶溼。歸來迹遽陳。何能發潛德。空有淚霑巾。

許待制尹輓詞

蚤擅文章價。名公屢品題。碑銘摹諫省。丘壑訪愚溪。得句追飛兔。搗毫走怒猊。遺編聞好在。後學仰筌蹄。

十載更磨節。陽春萬里同。時時逢蜀士。一一話文翁。到處留遺愛。諸郎守教忠。慶源知未艾。往日有陰功。

陳祕撰舉善 輓詞

陳氏多名德。茲來慕典刑。宮端驚宿草。謂邦彥。太子詹事。諡獻肅。宋史有傳。 祕撰又泉扃。自古有遺直。祗今誰獨

醒。蒼蒼何可問。蒼舊日凋零。

跬步不忘孝。掇皮皆是真。移忠思致主。務實見臨民。三諫言猶炳。平生迹遽陳。清風凜衰俗。自足盪秋旻。

王給事信 輓詞

主眷逢千載。龍光傾一時。銓曹著官簿。禁掖粲英詞。論議推東省。威聲懾北夷。平生經世意。懷卷竟何之。

宦學素稱豪。仍聞吏事高。精神雖腹滿。撫字亦心勞。藩輔連三組。沈疴見二毛。胡牀庾樓在。殘月墮江臯。

余給事 崇龜 輓詞

烏府仍螭陛。銀臺更掖垣。事幾無弗論。外似不能言。厚德鎮浮薄。平心剴劇煩。用才殊未盡。無地可招魂。

桂籍兄聯弟。蘭階子克家。上恩嘉踵武。京秩為增華。朝著蒙傾蓋。綸闈覩判花。遽成千古別。南望想悲笳。

史敷文 彌正 輓詞

八行諸孫盛。三公嗣子賢。連收四鶚薦。祗欠一青氈。郎省刑章肅。侯邦政譽傳。平生憂國意。齋志入重泉。

學問源流遠。樂哉賢父兄。人琴亡舊曲。風木愴寒聲。深痛幾成毀。沈疴迄喪生。孝恭無可憾。猶得傍佳城。

少小相從久。自慙雌甲辰。交情日加厚。姻好晚逾親。別去驚葭律。歸來見棘人。西莊行樂地。望斷為沾巾。

袁府君文輓詞

家學傳三世。凡間無二書。力行真勇猛。進取故舒徐。前輩多遺墨。先人祇故廬。後來窺甕牖。〔案〕袁文字實甫。有雜著一

編。名曰鑿屬閩評。志士為歎歎。

坦坦幽人履。恂恂長者言。憂時見顏色。樂道竟丘園。隱行推同氣。高賢萃一門。四明耆舊傳。他日數諸袁。

周路分良臣輓詞

蚤負功名志。從戎豈素心。治軍先肅靖。游藝亦精深。湖海開豪氣。雲天廓義襟。高門尚餘慶。蘭玉正森森。
台嶺論交契。天街惜別離。飛書能幾到。埋壁遽成悲。舊識歸樵句。在丹丘時探梅浮江。李使君有樵字韻詩。公和篇最工。云。卻從谷口問歸樵。愁
看結局詩。紫髯無復夢。空有淚交頤。

趙左司鞏輓詞

行誼高餘子。文章自一家。嶽神均客禮。敵國歎才華。直節曾無苦。全瑜更不瑕。儒流有遺恨。不見草黃麻。
淮甸爭錢幣。夔城辦戍兵。詔歸南郡近。公去北門輕。避寵若將浼。求閒竟不成。亦期無適莫。一笑老于行。
許國終無撓。居家不願餘。深蒙明主眷。未覺故人疎。高論三千牘。陰功四一書。佳兒承積慶。端可大門閭。
鄉貢早馳譽。郎潛方比肩。求仙容我學。成佛嘆君先。天癸年將暮。金丹語未圓。忽傳長別僞。天闊散雲烟。

王提刑正功輓詞

廉白真家法。原由金紫賢。兄辭嶺南賻。弟卻澧陽錢。築屋吾將老。藏書手自編。老成俄已矣。聞者為潸然。

籍甚青箱學。醜乎赤子心。片言皆可復。一僞不容侵。處事幾游刃。論交欲斷金。諸郎傳素業。桂子看成林。二廣外臺首。威棱著一門。志期諸郡肅。忍見匹夫冤。奮擊猶鷹鷂。與讒有兔爰。投閒了無恨。此意與誰論。伯仲三珠樹。優爲一世才。人琴先起恨。金玉遂俱摧。南阮方深痛。阿連尤可哀。桃花源上路。老眼更堪開。

王大卿正己輓詞

少壯節先著。年侵氣不衰。忠雖由父教。清亦畏人知。處世無求合。安時竟數奇。甘泉人物會。一老漢空遺。麾節東南半。澄清冠一時。權輿周翰傳。頂踵阜陵知。自謂二宜去。人稱三不欺。卷懷終未盡。流慶稱家兒。圖史但環堵。江湖幾問津。雖多暮年樂。誰忍半生貧。海內清名滿。毫端秀句新。風流嗟頓盡。晉韻更何人。老去王摩詰。歸來道更全。賸添天美祿。真得地行仙。日欲增三徑。君胡欠百年。桃源不無路。重上慘風煙。

劉吏部侯輓詞

總角異羣兒。庭趨蚤學詩。一鳴登桂籍。百里靜潢池。所至清民瘼。平生號吏師。郎闈方進用。何乃棄明時。劇劇最雲間。題輿上越山。洞庭王澤遠。庾嶺使星還。中道趨臺治。名曹切近班。陰功多及物。陽報看循環。誰擾奚山衆。焚林獸已窮。徒薪能遠慮。下瀨得深攻。南嶠肩隨息。中朝論愈公。但知分謗喜。寧肯自論功。兄長與慈恩。相親色笑溫。公方持使節。余忝代王言。共約遊三徑。俄悲作九原。佳城隔風浪。丹旆愴飛翻。

朱南劍輓詞

再世文章伯。三朝侍從臣。傳家推篤學。遊宦肯謀身。別駕歌章水。甘棠想劍津。虛堂兩遺像。誰不倍傷神。

朔望第一客。巡察意更親。有詩欣和韻。不飲喜娛賓。名帖藏中古。珍茶試早春。據鞞猶矍鑠。何遽迹成陳。某戰久不對。詩盟亦寢寒。方期會真率。乃爾變悲歡。歲晚本無憾。情深那忍看。佳城何處是。東望淚洑瀾。

石南康鑿輓詞

挺挺石可轉。恂恂衣不勝。平生憂國志。長夜讀書燈。大易窺三古。中庸進百能。惜哉天不憖。無復見川增。家有春秋學。淵源更得師。風高蓋公舍。淚落蔡邕碑。官早終難進。才全竟弗施。遺編屬賢子。孝謹不應衰。伊昔爲君御。儒流賴主盟。執經容後進。傾蓋若平生。坐見埋黃壤。空勞望赤城。友朋相與泣。反袂不勝情。

鄭華文若容輓詞

蚤擅春秋學。賢關第一流。少公清澤國。贊府著神州。試邑人交薦。還朝譽更優。如何急流退。不使上瀛洲。籍甚柯山政。兒童識貴溫。(案)本集有賀鄭貴溫寺丞直華文閣致仕詩。貴溫當是若容之字。歡謠聞魏闕。殊寵鎮吳門。就養家傳子。休官澤及孫。吾鄉耆舊傳。千載德彌尊。

袁通判章輓詞

大道知如路。一心長似齋。耄期稱不倦。胸次樂無涯。孝謹古難及。友恭人自懷。無瑕夜光璧。黃壤痛深埋。盛德不容贊。多言可奈何。大圭原不琢。古井竟無波。前輩苦凋謝。後生誰琢磨。同庚適齋老。託體共山阿。僅有一區宅。曾無二頃田。相過惟載酒。至老不言錢。幾得拜牀下。何堪哭道邊。門人多著籍。下馬向新阡。

張工部季樛輓詞

忠簡傳清白。家聲屬弟彛。惟公殿諸老。積善見多孫。兩桂昌書種。雙椿藹慶門。壽終無可憾。況有典刑存。壯歲登郎省。旌麾歷五州。仁聲號循吏。治行最諸侯。憂國言多切。籌邊慮更周。積薪無恨望。終老得夷猶。敕局同寅舊。雌堂屢肯過。故人今有幾。朝士更無多。問信書猶溼。相望鬢已皤。忽聞埋壁痛。薤露不成歌。

高端叔元之輓詞

百氏極旁搜。潛心老不休。鄰光時自照。簞食孰堪憂。弟子多藍綬。先生竟白頭。淒涼數間屋。知我獨春秋。鐵石賦梅花。閒情白玉瑕。兩公終磊落。千載敢諠譁。清節成瑰偉。浮詞尙蘖芽。君看死生際。不見一毫差。滿卷變離騷。歐公一素袍。豈惟將厚意。要使句殘膏。宿草成千古。生芻爲一號。雖無韓子誅。貞曜本來高。

趙提刑子濂輓詞

毓秀從天派。盱衡動至尊。使星方炳耀。卿月遽侵昏。已矣悲吳館。誰歟護北門。慶源流未艾。文獻藹諸孫。處事才游刃。論文辯粲花。英姿凜熊豹。健筆走龍蛇。持囊身終外。垂車夢到家。平原花木在。愁絕舊生涯。客授早登龍。襟期一笑同。門清心似水。論正氣如虹。近問書猶溼。重來跡遂空。無因送丹旆。老淚灑西風。

李撫州庚輓詞

與物初無忤。臺評反謂傾。麾符成漫仕。林壑寄平生。跪履嗟何晚。揮犀空復情。天台隔風浪。無地拜佳城。李下真無徑。門前可設羅。詩如翰林逸。書似鄴侯多。奇字今誰問。遺編尙不磨。從來好哀輓。薤露忍興歌。

蚤歲文聲振。長沙見賈生。積薪看晚輩。推轂致名卿。子舍真連璧。生涯付短檠。風流今李漢。極口贊冰清。

張欽州舟之輓詞

少誦東牕句。從君見典刑。義襟希寶十。才刃比庖丁。古鏡悲鸞偶。寒原愴脊鴿。恂恂守家法。蘭玉滿階庭。烟好自諸馮。東牀取阿戎。平時深念我。晚歲忍銘公。書字今猶溼。心期誰與同。回頭三十載。灑涕向西風。

錢江陰傳輓詞

虞嶺梅花賤。賢侯惠愛深。精神雖滿腹。撫字亦勞心。九轉竟難遇。二毛何處侵。傷哉東逝水。無復大江陰。
前知南安軍
移知江陰。

李刪定叔益輓詞

客授向東甌。君爲郡督郵。豈惟寮契篤。更喜吏才優。每嘆頻年別。俄驚一夢休。虞山渺何許。淚落不能收。積善務增厚。求名惟恐多。白圭寧有玷。古井竟無波。議法資修定。監州極撫摩。佳兒傳素業。留眼看巍科。冰玉心相照。誰云內舉私。深居無浪出。清節畏人知。尙憶紫芝字。無慙有道碑。填空雨黃葉。西望不勝悲。

樊運使光遠輓詞

科目公餘事。南宮第一人。七閩新使節。三署舊儒臣。倦拜方辭餽。哀良莫贖身。家聲知有繼。仙桂兩枝春。橫浦云亡後。斯文付此賢。命其隨道喪。學又絕心傳。河洛湮來派。西州憶舊緣。傷心耆老盡。揮淚對霜天。

丁寺丞允元輓詞

家世傳經術。膠庠藹雋聲。上方思舊學。公乃擅專城。滌上功尤著。潮陽政愈明。哀哉鏗流水。猶解不平鳴。嚴冷不可向。其中實曠然。行藏睽素志。燕樂了餘年。鶴化人何處。鸞孤影自憐。才高不盡用。流慶尙綿綿。

曹工部紹輓詞

箕穎文章士。儀同社稷功。惟公承慶裔。有意振家風。祠祿真崇道。郎潛嘆老馮。傷心循吏手。齋志九原中。宦達推公早。丁年備皂衣。幾爲銅虎去。終向石橋歸。齊國世臣少。貞元朝士稀。松風談笑地。回首倍歎欷。

范致政鐔輓詞

義俠久無迹。吾鄉見此翁。紫微欣稅駕。飛將許同功。銀茜聯恩渥。金蘭藹義風。雖增羸博恨。猶喜桂成叢。酒後昇平曲。閒中安樂窩。千金曾累致。一醉竟無何。老驥志空在。孤鸞悲亦多。相望纔歲許。託體共山阿。

梁審計季琦輓詞

壯歲嶄頭角。夷途試著鞭。羣公爭倒屣。諸老亦忘年。論議傾朝譽。功名短世緣。神傷賢伯仲。風雨夜無眠。壽夭固難問。吁嗟不忍言。嬰啼摧玉樹。衰淚灑芳萱。事契深羣從。英才愴九原。悲吟慙楚些。無地與招魂。

呂崇德晝間輓詞

剴劇推才刃。臨機妙斲輪。傳家得清白。滿腹是精神。未上金閨籍。空留花縣春。善人陽報在。蘭玉正訛訕。回首情親處。相過瀨水陽。十年能幾見。一疾痛云亡。縣郭山空秀。家園橘自霜。主人今已矣。鷗鷺亦淒涼。

王縣尉彥正輓詞

幹盡恢才刃。誰能貨殖私。人皆競毫髮。我獨破藩籬。風雨空殘夢。池臺愴昔時。板輿臨穴處。行道亦興悲。潤屋公餘事。能爲人所難。蓼莪遺恨在。夜雨舊盟寒。家有書堪讀。囊無錢爲看。情親悲不那。望絕旄飛丹。

唐舍人關輓詞

鴈塔名三世。螭坳侍九重。循循儀學館。諤諤著囊封。至性悲三釜。高懷薄萬鍾。典刑傷不見。哀涕忽無從。夷路方馳轡。甘泉喜問津。廟廊平日志。露電百年身。摛掌雖多恨。爲箕自有人。發棠陰德在。陽報質蒼□。

徐少卿子寅輓詞

聖主一言寤。長淮千耦耕。山川皆在目。草木尙知名。盡被腰金寵。徒爲攬轡行。諸郎襲餘慶。定自不慙卿。所至多遺愛。丹丘最有聲。奉常千載久。攀戀一城傾。已恨數離別。寧知隔死生。湖邊舊門巷。一到一心驚。

陸提刑洸輓詞

數馬謙恭甚。揮犀色笑溫。風流士龍裔。文采左丞孫。晚幸成三徑。身胡遽九原。素欽仁者勇。大獄竟平反。早歲擅詞場。夷途列鴈行。一麾分楚甸。雙節照江鄉。蓮社容寒晚。葭莖接老蒼。八旬俱已矣。回首倍淒涼。

陸參議沈輓詞

中外衣冠盛。流傳識後凋。聲名三語掾。身世半僧寮。寶晉書尤逸。坡仙隱可招。梅溪殘月墮。蕪沒舊風標。飾吏先儒雅。低徊五十霜。萑苻掃詔右。桑柘滿黃岡。知已平津老。家傳刪定郎。八龍無半在。風雨夜侵牀。

蔣慈谿鵬輓詞

伊昔丹丘去。相逢意氣傾。樓前巾子秀。山下育泉清。敬梓情逾厚。交梨論益明。淒涼千古意。潮落又潮生。
下筆欲生風。磨礪日有功。推敲詩益鍊。駢儷語尤工。經問南雷叟。家傳十八公。詞人誰可繼。文陣滑稽雄。

吳大監飛英輓詞

庠校聲名早。朝廷譽望尊。忠言如日皎。笑語若春溫。四擁皇華節。屢登金馬門。用才終不盡。流慶在仍昆。
曠典將行日。南宮得舍人。銓衡輕易地。造化漫勞神。舊事誰能記。交情我獨親。吁嗟三昧手。不見掌絲綸。

俞通判茂元輓詞

強仕賦歸去。頻年亦漫行。宦情雖淡泊。官事極精明。贊畫王公幕。監州亞父城。佳兒守遺訓。清白勝金籙。
象邑推三俊。靈光賴此賢。老成俄已矣。遽邇爲潸然。孝敬心何極。公平錄尙傳。佳城隔風浪。忍賦薤歌篇。

陳崇道輓詞

學造龜山蘊。詩傳汝水餘。于公足陰德。陶令竟閒居。白業追蓮社。丹經授寢虛。其父號寢虛先生平生了無恨。善類
勿歎歎。

未第聲先振。纔官節已奇。精誠與神合。隱行畏人知。晚境終無玷。遺文尙可師。功名齊志歿。回施稱家兒。
鮑潮州漣輓詞

三試皆前列。一官何後時。低徊廣文舍。齟齬使君廳。遇事有如燭。衛生寧及葵。舊游成隔世。流涕讀新碑。
客授壬辰歲。巍科盛永嘉。芹宮屢揮麈。竹院幾烹茶。假守深交誼。清談及道家。猶懷郡齋晚。羣雀噪簷蛇。

